

# Hoenx Duzmbaj

Gyanghaemh, gou lumj bingzciengz nei naengh youq henz daiz sij cozyez, sawqmwh, duz mbaj ndeu mbin gvaq naj da daeuj, dajduenh gou guh cozyez lo. Cijraen duzmbaj youq gwnz daizdaeng mbinfoux, doiq fwed de wenjyebyebye miz di rongh. Gou deng duzmbaj iquetet neix supyinx, sikhaek cuengq bit roengzdaeuj, siengj bae gaeb duz mbaj “mbouj cingj cix gag daeuj” neix.

Gou mbaetheiq mbaetkaw, menhmenh ndwn hwnjdaeuj, yup hwet dwk, siujsim sisi iet fwngz okbae, siengj nebdawz duz mbaj haenx. Hoeng, de lumjnaeuz senq couh rox nei, riengjvaiq dwk ndoj gvaq song faj fwngz gou. Ai, duz mbaj ganvad neix! Gou mbouj cuengq gvaq de, youh caiq ietfwngz okbae, hoeng moix baez gou depgaenh de, de cungj ndaej riengjret mbin bae gizwnq. Gou gyaep bae gyaep dauq, daengx gyaepj hanh dumz caez, hoeng baenzlawz cungj gaeb mbouj dawz. Yawj, de vadvad doiq fwed, ngauznged aenndang baenq gvaengx youh mbin dauqma lo, lumjnaeuz daegdaengq nyex gou nei, gou gikheiq yaek dai bae!

De yied mbin ndaej daekeiq, gou yied ndwnj mbouj roengz gaemz heiq neix, cungj banhlap neix

guh mbouj doeng caiq vuenh lingh cungj. Baezneix gou gietdingh yungh honggaiq daeuj gaeb, gou ra aen batdiet daxmeh swiqbyaek daeuj, maqmuengh ndaej vaiqdi gaebdawz de. Caepcawq ndei le, gou naihsim caj duzmbaj caiq mbin daeuj. De daeuj lo, de daeuj lo, gou fwt vax aen batdiet doq goeb gvaqbae. “Gvang!” Sing hung ndeu saenq haeuj rwz gou. Haha, lwg mbaj neix, baezneix mwngz miz fwed hix mbin mbouj okbae, mwngz laihaeuz gou ceih mbouj ndaej mwngz! Gvaq yaep ndeu, gou siujsim gwenj batdiet hai geh iq he, siengj yawjyawj duzmbaj youq ndawde baenzlawz yiengh, hoeng gou lwgda gvaengx yawj baenz hop, baenzlawz cungj ra mbouj raen duz de. Cingqngamj youq seizneix, duz ngaueuz ndeu daj baihnaj gou mbin gvaqbae, a, lij dwg duz mbaj haenx, de vanzlij cwxcaih dwk mbin ha, ndaw sim gou cix roxnyinh doeknaiq liux: Dauqdaeuj dwg gou guh mbouj deng, roxnaeuz dwg duz mbaj neix coengmingz lai?

Youq mwh gou mbouj siengj caiq leixlangh duzmbaj, daxbuz byaij haeujdaeuj lo. De raen gou najsaep doeknaiq, couh cam cingcuj dwg gijmaz laizyouz. Daxbuz riunyumnyum yawj gou, riengz-



laeng bae au aen daengciuq iq, yaeng' yaeng cuengq youq mbiengj baihgwnz duzmbaj, duzmbaj raen miz ronghdaeng, menhmenh mbin haeuj ndaw daengciuq bae. Seizneix, daxbuz fwngzmbaeu gaem aen daengciuq hwnjdaeuj, duzmbaj couh deng de gaebdawz lo.

Gou cimyawj daxbuz, ndaw sim boiqfug dangqmaz. De yungh banhlap genjdanh, gig yungz-heih couh gaijgez le gij saeh gou buenqngoeng cungj gaijgez mbouj ndaej haenx. Daxbuz riu naeuz: “Gingniemh caeuz dungxcaiz, mizseiz beij dandan roengzrengz guh engq mizyung.” Ciuq neix ma yawj, mwh youqgaenj lij yaek au lauxsouj okfwngz!

(Dangz Yimingz raiz / Lij Siulingz hoiz)



## Gij Gyaenz Ndaw Soujgih

Daxmeh maij ciuqsiengq dangqmaz, daegbied dwg bang gou ciuq. Ndaw bouhsiengq soujgih de cungj dwg gij siengq gou. Yawj, neix dwg gij siengq gou ndaej cib bi ngoenzseng le daxmeh bang ciuq. Ngoenzhaenx, daxgoeng daxbuz hawj gou aen hoengzbau hung ndeu. Banhaemh, gou naengh youq gwnz mbonq naemj: Baez fwndoeck, hwet daxgoeng couh lumj deng rumznit con haeujbae nei, in dangqmaz; geij ngoenz gonq, daxbuz mbouj siujsim aen gingqlauxva de doek vaih lo, mboujmiz gingqlauxva, de cungj dwg nyaueqda dwk yawj densi. Mboujcix, gou couh au aen hoengzbau hung neix cawx huqlaex hawj gyoengqde ba! Gou gaem gij cienz, baez mbaw baez mbaw geq dwk. Daxmeh yawjraen le, gaem soujgih ciuq roengzdaeuj lo.

Gaxgonq, gou mbouj rox daxmeh vihmaz cungj dwg bang gou ciuqsiengq. Cig daengz miz mbat ndeu, gou fanyawj soujgih de, yawjraen mbaw siengq gou daegdaengq goemq naj haenx, couh cam daxmeh: “Seizde gou vih gijmaz goemq naj ne?” Daxmeh riuriu, gangj: “Seizde mwngz ngamq vuenh heujdou, haeujeiq yienghsiengq lai, mbouj hawj gou ciuq ho!” Caen ienqhoij ha, gou caen siengj yawjyawj gij yiengh swheij ngamq vuenh heujdou haenx, hojsik yawj mbouj raen lo. Yaephaenx, gou dauqdaeuj rox lo, daxmeh ciuqsiengq hawj gou, dwg siengj geiq gij rizroen gou majhung.

Seizneix, daxmeh baez gaem soujgih hwnjdaeuj, dawz gingdouz doiqcinj gou, gou cungj mbouj ged saekdi naj riu ronghsag coh de. Aenvih gou rox, gij gyaenz ndaw soujgih daxmeh, moix mbaw cungj gig dijbauj.

(Vangz Sijyez raiz / Nungz Cinfung hoiz)

## Gou Bang Daxgoeng Gaiq Ien

“Gwgw……” Geizheih, ndaw ranz-saeuq baenzlawz miz oenq? Itdingh dwg daxgoeng youh gwn ien lo! Deq de dauqma, cam de gonq.

“Ngadnged”, daxgoeng dauqma lo, gou doq diuq hwnjdaeuj, buet gvaqbae cam naeuz: “Daxgoeng, mwngz dwg mbouj dwg youh gwn ien la?” “Baenzlawz ndaej? Gou mbouj gwn!” Gou fan da hwnj mbwn mbat he, naeuz: “Mwngz yaeh gou, gou cungj supsuq daengz lo.” Daxgoeng riuhehe: “Ndei ba, gou nyinh, baezlaeng mbouj gwn lo.” Gou simsiengj: Hw, daxgoeng youh lox gou! Ngoenzneix couh cuengqgvaq de ba.

Daxgoeng cungj gwn ien mbouj baenz hw, gwn ien doiq bwt mbouj ndei, caiqlij gij heuj daxgoeng cungj bienq saek lo! Mbouj ndaej, au hawj de gaiq ien.

Raiz cozyez liux le, gou guh mbaw biuj giva gaiq ien ndeu hawj daxgoeng: Gyanghaet mbouj gwn, lajbyonghngoengz gwn ciuq ndeu, gyanghaemh gwn ciuq ndeu. Daxgoeng banhaet boenq, mboujmiz seizgan gwn ien; lajbyonghngoengz caeuz banhaemh miz hoengq, gak hawj de ciuq ndeu gaij ngah ba.

Mwh gou dawz mbaw biuj gaiq ien neix cuengq youq dangqnaej daxgoeng, de nyengh mbat he, dawz hwnjdaeuj yawj le geij cih saw, couh ienq naeuz:

“Aiyo, neix mbouj dwg au mingh gou ha? Mbouj gaiq ndaej law?” Gou gangjndongj naeuz: “Mbouj ndaej! Bietdingh au gaiq! Ngoenzcog hainduj gaiq.” Gou mboujguenj saeknaj daxgoeng baenzlawz, saetdiuq bae ninz lo.

Ngoenz daihngaih, gou doq hwnq doq muedsou gij ien daxgoeng. Va! Caen dwg

mbouj noix, hab iq hab laux, ciuq ndeu song ciuq, baizswj mbouj doengz, guen de ne, cijaeu dwg ien, haemzbaengzlaengz muedsou liux! Baez “daih baetkaw” neix, gij ien daxgoeng lai dwk gou ca di dawz mbouj roengz lo. Mboujgvaq gou sim'angq raixcaix, ceiqsiuj, gou goenq gij “haeux” daxgoeng lo.

Baez daengz banringzgaq, daxgoeng sikhaek daeuj au ciuq ien de, gou gig sangj couh hawj de lo. Hoeng, gou roengzdzangz dauqma, cix raen noix hab ien ndeu! Gou ra bae ra dauq, caen youq ndaw doengjgviha daxgoeng ra ndaej dahraix. Gou najhaen cam daxgoeng: “Gij ien vihmaz youq gizneix?” Daxgoeng hemqgouz: “Lan gou ha, ngoenz ndeu gwn song ciuq ien, noix lai lo…… Couh ce hab ndeu hawj gou ba……” Gou han naeuz: “Mbouj ndaej, vihliux mwngz ndangcangq, hix vihliux dou ndangcangq, mwngz gaiq hix au gaiq, mbouj gaiq hix au gaiq!” Song dou buek bae buek dauq, daxgoeng doeklaeng dapwngq lo. Mboujgvaq, de miz aen iugouz iq ndeu—Aeu baez yamq menhmenh guh roengzbae. Ndae j ha, yawj de bingzseiz baenzneix gyaenz gou, gou couh dapwngq de ba!

Ai, gou yawj daxgoeng gaiq ien rap naek roen gyaen ha!

(Lij Swjgyah raiz / Lij Lungzfangh hoiz)

